



Thailand PM inyaktsü Paetongtarn
tezüngüktep agiogo

AC Milan-i France nunger
asayar Fofana alizükogo

VOL. XXI ISSUE NO. 306 (ADOK 306) DIMAPUR TENTONÜ (MONDAY)

LUROI (AUGUST) 19, 2024

₹ 5.00

Manipuri oshi 'classical status' angutsü

Imphal, August 18, 2024 (Agencies): India nung Manipuri oshi 7th classical status ama züngsemtsü mapa tembangogo ta Manipur chuba aser Rajya Sabha MP Leishemba Sanajaoba-i ashi

MP Sanajaoba ya Official Language of India nung züngsem ka lir aser Deobarnü Imphal nung sentong ka nung jembidang iba osang lemsatep.

"Manipuri oshi ya küm 2,000 shi jembia aser zülua arur anungji kobi melii classical (language) status angutsü" ta pai ashi.

"Centre sorkari classical language status angutsü atema onük pezü lateta lir aser Manipuri oshi ajanga telateta pezü atonger" ta MP Sanajaoba-isa ashi.

Manipuri (Meitei) sohi ya 1992 küm Indian Constitution nung 8th Schedule nung

züngsema liasü aser iba ya mezungbuba Tibeto-Burman züngsema lir.

"India-i classical languages 6-Tamil, Sanskrit, Telugu, Kannada, Malayalam aser Odia agizüker. National Education Policy 2020 ajanga Pali, Persian aser Prakrit wazuka ayutsü latettsüogo aser item oshi züngsema 9 lir. Maneni Manipuri, Marathi, Maithili, Bengali aser Pali oshitem asoshi official classical status meshir" ta pai metedaktsü.

2020 nung Bharatiya Janata Party (BJP)-i Rajya Sabha MP inyaktsü atema Leishemba Sanajaoba shima liasü. Pai politics nung tetsüng ajemokba nungi India sorkar dang Meitei oshi ya "classical language" ama agizüksü mapa inyaka arur.

Senden nung tetsür media persons dak sendakba tebilemtsüem benoka lemsatep aser tetsürtem sensaksemtsü, tesentaktep yanglutsü aser osang lemsateptsü atema forum ka tentetsü bangjemtep.

"Iba telok ajanga women media persons tajungba kümduktsü asoshi workshops, seminars aser tours ayongzuka agitsü. Forum nung taintemi lanurtem anitetsü" ta AWJF-i sangdong ka nung ashi.

Iba forum len anitsü atema PTI Guwahati bureau chief Durba Ghosh president aser The Assam Tribune nungi Nasreen Habib general secretary ser züngsem 11 agi akumba luden ka shim.

NFR-i "Karmveer Puraskar" sempet agütsür

Guwahati, August 18, 2024 (Agencies): Northeast Frontier Railway (NFR)-i "Karmveer Puraskar" awards tenzükogo aser iba ya railway nung inyakertemi tasüta mapa aser bendanga agüja inyakba atema tenüngsang agütsüba sempet lir.

NFR zone nung tang mezung atema iba akhümtet sempet agütsü tenzük.

Independence Day nung N.F. Railway General Manager Chetan Kumar Shrivastava-i iba sempet agüja liasü. Sempet angur shia nem kulikaket aser senpet agütsü.

"Iba sempet angurtemi tasüta mapa inyakba aser bendanga agütsüba atema tenüngsang agütsür. Nenoki Indian Railways indang tamendakdak nung aliba ama mapo tajungtem inyakogo aser iba atema kanga nüma atanger" ta Shrivastava-i ashi.

"Nenoki inyakba mapatem ajanga nisung aika taküm

SC-i Kolkata doctor ken o benok; Padma awardees-i PM dangi shidi zülu



New Delhi, August 18, 2024

(Agencies): Kolkata doctor ka dak tashiyim agi shi nung medemba aser tepsetba ken o Supreme Court-i benokogo. Chief Justice of India DY Chandrachud-i anir judge asem adenba bench kati iba ken Mongulbarnü angadangtsü.

Iba ken o ya Calcutta High Court nung benoka angadangogo aser idangji Central Bureau of Investigation (CBI) nem bushisüngdang südaktsütsü tetuyuba agütsü.

Tetsür doctor'er tsüraburtem den nisung kari police-i bushisüngdang asüba nung temulung masüba agi High Court nung ken o benok.

Tetenzük nungi police-i iba ken o asoshi teinyaktsü shitak meinyakba atema nisungtemi ola adok. Police-i tetsürler tsürabur nem mapang shitak mang mereprangdaktsüba, postmortem report magütsüba aser civic volunteer ka pur ken o

tembangba atema nsiungtemi ola adoker.

Tetsürla dak zübo keta aliba ajanga la dak nisung kati dangbo iba mapo meinyak ta doctor temi ashir. Ano police-i kanga dang aritepa mang rongdok ta ashir saka ibaji Kolkata Police-i masüta ashir.

Deobarnü Padma sempet anguba doctor 70 shi kati Prime Minister Narendra Modi dangi shidi ka züluogo.

"Kolkata nung R G Kar Medical College nung lendong atalokba atema süoki ia bilema aser jashiseta onoki nü dangi iba shidi zülu. Linük madak tekolakba ama nai iba ken o atema tebang ia inyaktsü ajungmesor. Iba ama taochi maliba inyakyim ajanga medical professionals mapa

tamendakdak anokshitsü aser talisa tetsürtem aser health care professionals dak tashiyim mapo inyakba azüoktsü nüngdakba nenshir" ta Padma awardees-i

zülu shidi nung shia lir.

Iba shidi nung All India Institute of Medical Sciences, Delhi taoba director Randeep Guleria, Medanta The Medicity chairman & managing director Naresh Trehan, Mahajan Imaging founder Harsh Mahajan, Fortis Escorts Heart Institute chairman Ashok Seth, Indian Council of Medical Research taoba director general Balram Bhargava aser Institute of Liver and Biliary Sciences director SK Sarin nungeria sign stüa lir.

Padma awardees-i PM Modi dangi zülu shidi nung onük pungu takhangba agüja lir.

Parnoki tang yanglúa ozüngtem akangakanga benshitsü, tashiyim agi shi nung medemertem nem temerenshi tuluba agütsü, hospitals & medical institutions nung security akangshitsü, healthcare workers kümzüka ayutsü atema special law mapo tenzüksü aser healthcare workers anema inyakertem ozüng tesashiba agi merenshitsu takhangbatem agütsür.

"Linük nung akhümket civilian honours angurtem ama onoki ola adoktsüla ta angateta mapang shitak nung mapo inyaktsü aser temelensi asütsü atema shidi zülu. Onoki nü dang healthcare workers ajak kümzüka ayutsü mepishir" ta parnokissa PM Modi dang ashi.

Honibarnü Indian Medical Association (IMA)-i PM Modi dang tetsür health workers mapo inyakdak kümzüka ayutsü atema shidi ka züluogo.

Rongmei Naga nungeri Manipur sorkar anema lungkak aiter

Imphal, August 18, 2024

(Agencies): Assam, Manipur aser Nagaland nung aliba Rongmei Naga nungeri Manipur nung NH-37 dena tongtipang lenmang aika mokdangtsü

developmental programs belenang ta Rongmei Naga nungeri takhangba agütsüba ama Manipur sorkari meinyakba atema parnoki iba lemtem agi.

ashi.

RMC-i June 15, 2024 nü parnok takhangba onüktem adenba memorandum ka agüja liasü.

Rongmei Naga nungeri NH-37, Leimata Loktak Project Road aser Tongjei Maril Road mokdanga lir. Ajisüaka medical emergencies, essential services aser educational institutions iba mokdang nung madener.

"Kuki nunger teimba ser aliba Churachandpur o Kangpokpi district tem nungi Naga nunger

dang aiben mepishiaka telangzüba magütsüba agi onoki temsma lenmangtem mokdangtsü lemtem ta Manipur nung Rongmei Naga Council-i

administrative aser

"Iba jagi 'Vision Plan 2047' nung aibelenha atema meyipa agi

Guwahati/New Delhi, August 18, 2024 (Agencies): Northeast

region nung social & economic development atema nodal agency kati Kuki (Chin) nunger

3 nung 'Art, Culture and Natural Heritage' nung iba aibelen liasü.

Myanmar kübok Chin State ajanga Manipur aser Mizoram den arrtsütepa lir.

North Eastern Council (NEC) ya 1971 unng tenzük. 2008 nung NEC-i 'Vision 2020' document yanglu aser 2020 tashi nung Northeast nung tensa süngejmtsü, tashitaitba akümtsü aser rongsenketzung dena alizüng aika yua liasü.

region nung social & economic development atema nodal agency kati Kuki (Chin) nunger

Minister Jyotiraditya M Scindia den iba onük lemsatep ago

"NEC Vision Plan 2047 nung aibelen aliba sülen DoNER Minister Jyotiraditya M Scindia den iba onük lemsatep aser agienogo" ta pai ashi.

Iba vision document Chapter

region nung social & economic development atema nodal agency kati Kuki (Chin) nunger

Minister Jyotiraditya M Scindia den iba onük lemsatep aser agienogo" ta pai ashi.

Iba vision document Chapter

Melbourne nung 'Headhunting to Beatboxing' sayu



Melbourne, Australia nung "Headhunting to Beatboxing" documentary film premier asüba mapang tangokba noksa ka nung TaFMA Chairman Theja Meru, Advisor to CM Abu Metha aser Dr. A. R. Rahman nungertem angur.

Dimapur, Luroi/August 18 (TYO):

Grammy, Oscar aser BAFTA Awards angur Dr. A. R. Rahman-i yangluba "Headhunting to Beatboxing" documentary film Australia kubok Melbourne nung sayua liasü.

Iba film mesayudang Dr. Rahman nem Excellence in Cinema Award agüja liasü.

Iba sentong ya Melbourne nung International Film Festival nung shilem ka liasü. Iba sentong nung Advisor to Chief Minister, Nagaland and IDAN, Chairman, Abu Metha aser Chairman, TaFMA, Theja Meru nungera dena liasü, shirnok iba film indang executive producers lir.

Iba sentong nung sempet agütsürtem rongnung Victoria State indang Governor, Melbourne indang Mayor aser Minister of External Affairs nunger den Abu Metha dena liasü.

Iba sentong nung jembidang Metha-i Naga nunger kin balala indang sobaliba aser senmang tajung indang jembi aser itemji ken aser tsüngsang ajanga sayur, ta ashi.

"Ozü sobaliba tajung ya putu sa putu melentepa amshia arur aser tanü item otsü ya alima dang ozü artists aser cultural ambassadors temi ashir," ta Metha-i ashi.

Pai Naga nunger kin balala ajanga akhi mapang nungi munga aruba benjongbentsü aser Hornbill Festival indang tongmelang agi rateta aser iba benjongmung ya Naga nunger takum yimya, sempet, shisatsü aser libaliru benjongba lir ta ashi.

Pai alima nung aliba nüburtem dang iba "Festival of festivals" nung arua adentsü aser Naga nungeri meimchir asoshi mapa tajung inyakba angatetsü ayongzük.

Dr. A. R. Rahman-i Nagaland den lungjemer inyakba atema pai pelaba lemsatep aser Rahman ama global brand kati Naga lanurtem temaba jenjangi ajungketba ya rongsen agi alizüksü makok, ta ashi.

Iba project asangsang akumtsü asoshi Chief Minister Neiphiu Rio-i yariba atema

Metha-i pelaba lemsatep aser film ya küm pongu agia yanglu ta ashi.

Iba film festival nungya nüngtugu film yanglurtem, kentener, ken mejemer, film directors aser art promoters tem dena liasü.

Iba film sayaba sentong nung aser iba sülena film directors Imtiaz Ali aser Rajkumar Hirani nunger dena liasü. Kasa sentong Awards Night nung India nungi Karan Johar, Ram Charan, Malaika Arora, Nora Fatehi aser Kartik Aaryan nungera dena liasü.

World Premier sülen Interactive Q&A mapang iba film nung shidakba hero tem ya Nagaland nungi kentener aser artists tem lir, ta TaFMA Chairman, Theja Meru-i ashi.

Iba film ya ajanga Nagaland aser state indang music industry temaba jenjang nung ajungkettsü imlar, ta pai ashi.

Paisa iba benjongmung ayonger aser ano Victoria aser Melbourne sorkartem dang lenmang balala nung yaritepbä atema pelaba lemsatepa liasü.

METONGSHITSÜR

Tir Yimyim August 18, 2024 adok Tapak 1 nung "Mangkolemba Ianurtemi khukhua aitsür" osang nung President Moayanger masü saka Toshiyanger ta metongshitsür.

Wokha DPDB senden August 20 nü amentsü Dimapur, Luroi/August 18 (TYO):

August ita atema Wokha District Planning & Development Board senden Deputy Commissioner, Wokha indang Conference Hall nung August 20, 2024 anüngdang 11:00 ako nungi amentsü, ta Deputy Commissioner & Vice Chairman DPDB, Wokha, Vineet Kumar, IAS ajanga sangdong ka nung ashi.

Iba senden nung züngsem ajak medema arua adentsü ayongzük, ta sangdong ajangasa ashi.

CPO ajanga blood donation camp ka ayongzük



Dimapur, Luroi/August 18 (TYO):

Chakroma Public Organization (CPO) ajanga Rev. Zhaviu Khro Memorial Hospital, Chumoukedima aser Christian Institute of Health Sciences and Research, Dimapur den lungjemer blood donation camp ka Honibarnü ayongzükka liasü.

Iba camp nung lenla balala nungi volunteers 110 shi arua shilem agia liasü, koba Chakhroma Public Organization tenteter taküm

In the court of Sh. Anurag Thakur Sr. Civil Judge-cum-Rent Controller, East Room No. 105, New Building, Karkardooma Courts, Delhi SUMMONS/NOTICE FOR SERVICE BY ADVERTISEMENT IN A NEWSPAPER (Order V, Rule 20 of the Code of Civil Procedure) CS/93/2024

STATE BANK OF INDIA Versus MAONGTOSHI AO

To, MAONGTOSHI AO S/o IMLIWATI AO At : 164, INFBN TA (H&H) NAGA C/o. 99 APO, Kohima, Nagaland, 797001 Also at : C/o. Near AO Fellowship, Nagajan C, Khel Khela Village, Nagajan, Dimapur, Nagaland 797112 Also at : Employee ID 1623553, Through Commandant, DG NCC Camp, Delhi Cant. New Delhi-110010

Whereas plaintiff State Bank of India, has instituted the above Suit/ filed an application against you for Suit for Recovery of Money Rs. 2,82,351/- (Two Lac Eighty Two Thousand Three Hundred Fifty One Only) as on Dt. 07-02-2024. You are hereby summoned to appear in this Court in person or by a pleader on the NDOH i.e. 04-09-2024 at 10 am, to answer the same, failing which the suit / application will be disposed of ex-parte.

Sd/ Sr. Civil Judge-cum-Rent Controller, East Karkardooma Courts, Delhi

November ita küm 150 ajungba nüngtem nung ayongzükka liasü.

Nisung balalai pei senti azü tenlabu atema CPO ajanga pelaba lemsatep, aser parnok mapa tajung yagi nüngdakbapur aika yaritsü, ta ashi.

Iba camp nung yaritepbä atema Rev Zhaviu Khro Memorial Hospital, Chumoukedima aser CISHR Dimapur ketdangsür danga pelar, ta CPO sangdong ka ajanga ashi.

NVBDCP ajanga Dengue nungi jenbunga alitsü yimya sayur

Kohima, Luroi/August 18 (TYO):

Nübürtem anema alitsü mech National Vector Borne Disease Control Program (NVBDCP), Directorate of Health and Family Welfare Kohima ajanga Dengue Fever nungi nokdangtsü aser anepalutsü atema teinyaktsü maparen balala metedakja liasü.

Nagaland nung nübürtem Dengue Fever ajanga kanga sashia kongshiba nungi kumzüka alitsü aser iba tashidak prokshiba ajemdaktsütsü nükjidong nung iba advisory ya agütsü.

Inyaktsü:

1. Rest: Nü temang taneptsü anguba nung yaritsü atema peria anisüngzükang.
2. Stay Hydrated: Temang nung tzü peria alitsü atema tzü aika jemang.
3. Medication: Healthcare professional temi ashiba ama paracetamol mesüra acetaminophen ama temang arongba ajemdaktsüba mozü
4. Consult a Doctor: Na teponü, teni, natzü nung azü lira, mesüra tebok indokba nung azü lira tekeratiba nung temang reprangdakjang.
5. Isolation: Tashidak meporokshitsü atema na dangar nungi pila liang aser kinunger nem nü temang kanga junga anepaludakjang.
6. Prevent Mosquito Bites: Merila sü, aben-süoshi talang sema nüsasa kumzüka liang. Anüngdang repellents amshiang.
7. Use Mosquito Nets: Merila nem memetepdaktsütsü asoshi na mejangdang meria sü ainang.
8. Secure Your Home: Kijiba aser kishi nung wire mesh inok kilongi merila taitdaktsü.
9. Reduce Mosquito Breeding Sites: Ner ki temeket nung tzü talisa tzünglu aruba mapang tzü atsüngä aliba

amshiang.

10. Visit Outbreak Areas Cautiously: Dengue tashidak pokteta aliba tesemi aodang merila nem memetepdaktsütsü kumdanga senzüang.

Teinyak:

1. Avoid Self-Medication: Pei sasa tapi agi mozü machitsüla mesüra unqualified nisung dang tasüngdang.
2. Medication Caution: Ibuprofen, Aspirin, aser Naproxen sodium tamshi, kechiasier item yagi azü tali yimdaktsütsü.
3. Limit Physical Activity: Temang tamajungba akumtsüsa mapa tasaktaret teinyak.
4. Oral Care: Teponü nungi azü yimra, tepo memeyui mouthwash ang amshiang.
5. Prevent Stagnant Water: Ner ki temeket nung tzü tatsüngtendaktsü; merila mapoktsü mechí anogoshi meindoktetra hopta shia

teti indokang.

6. Avoid Outbreak Areas: Akok tashi Dengue tashidak pokteta aliba tesemi maotsü merangang.

7. Protective Measures:

Anepdang aser nikongdang meria tali aruba mapang protection medeni kima mena tekazü.

8. Visiting Dengue Patients: Dengue agi shiranger semdangba mapang merila memetepdaktsütsü mera agiang.

9. Steroids: Doctor prescription medeni steroids tamshi; Dengue Fever kisüng atema itemji mamshir.

10. Platelet Transfusion: Menüngdakba nung platelet transfusions tesü; itemji azü ayimer mestüra kanga sashia shiranger atema dang nüngdaker.

11. Fogging: Merila azüoksü atema fogging kisüng nung dang temulung telem, kechiasier yangji timtema lir

aser merila entzü aser mesen mesamatsü.

12. Dengue RDT Caution: Rapid Diagnostic Tests (RDT) kumdanga amshiang, kechiasier item yagi tiazü nunga positives sayutsü. Naga Hospital Authority Kohima aser District Hospital Dimapur amala mozüki nung aiba Sentinel den jangjatepang. Dengue tashidak putettsü atema RDTs amshitsü Government of India (GOI) aser Indian Council of Medical Research (ICMR) ajanga mashir.

Nübürtem Dengue Fever nungi kumzüka alitsü atema NVBDCP, Directorate of Health and Family Welfare Kohima ajanga item guidelines sülen anidaktsü ayongzük. Iba dak sendakba nung osang tali metettsü aser teyari atema na anasa local health authorities mesüra Dengue Helpline number +917630932527 den tongteprateptsü akok.



August 18, 2024 nü Bulandshahr nung van ka aser bus ka na tsüktepba lendong nung yirurtem hospital kati anir oa yaridang tangokba noksa nung angur. Iba lendong nung nisung 10 asü aser nisung 27 yiruogo.

PK Mishra leniba nung ketdangsertem Monkeypox tensa asadang

New Delhi, Luroi/August 18 (Agencies): Amongnū Principal Secretary to Prime Minister, Dr P K Mishra leniba nung tongti ketdangsertem senden ka mena Mpox mesüra monkeypox ta ajaba tashidak atema terenemshiba jenjang asadanga senden ka menogo; Ato kilonser Modi kubok sorkari iba tensa ya mita reprangdar, ta ketdangsertem osang ka ajanga metedaktsü.

Sorkari sangdong ka ajanga, "World Health Organization (WHO)-i Mpox ya Public Health Emergency of International Concern (PHEIC) lir ta August 14, 2024 metedaktsü.

anogo nung sangdongogo; iba tashidak ya Afica tesem aika nung prokshiogo," ta metedaktsü.

"Tamalen WHO-i ashiba agi, 2022 küm nungi tenzuka linük 116 nung nisung 99,176 dak Mpox putet aser nisung 208 asü.

Democratic Republic of Congo nunga iba tashidak kanga prokdar. Yaküm iba tashidak agi shiranger aika liasü aser taküm küm iba tashidak agi shirangertemji yaküm shirangertem dang nungi 15, 600 agi teimba lir aser nisung 537 süogo," ta kasa sangdong ajangasa metedaktsü.

NC lenir Omar Abdullah-i J&K assembly election nung tokteptsü

New Delhi, August 18 (Agencies): Jammu & Kashmir nung assembly election agitsü atema August 20 nü sangdong agütsüba sülen National Conference (NC)-i party candidates sangdongtsü, ta Amongnū NC tatong tir, Omar Abdullah-i metedaktsü.

Jammu & Kashmir nung shilem asem lemsar September 18, September 25 aser October 1 anogostem nung election agitsü aser October 4 nü vote azüngtsü.

Taoba mapang Jammu & Kashmir Chief Minister, Omar Abdullah-i, Jammu & Kashmir nem tanaben state jenjang magütsü tashi pai election nung metokteptsü ta jembia liasü, ajisüaka Honibarnü Election Commission of India (ECI)-i election agitsü anogotem sangdongba sülenbo pai election nung tokteptsü telemtetba agitsü akok.

Amongnū Srinagar nung osangbenertem den jembidang pai, "Iba election atema ni kübu aser National Conference Tir, Farooq Abdullah aser party nung külem lenirtem den o lemtepba sülen ni telemtetba agitsü," ta metedaktsü.

"Ni election nung metokteprer saka party-i kanga rongshir. Ni party nung külem lenirtem den jembitsü aser taruba anogo ana-asem tsüngda telemtetba agitsü," ta pai ashi.

"Kübu (Farooq) kanga tambur kümogo aser khenkenbo kanga shiranger. Pai kü dang 'nai election nung metokteprer ni tokteptsüsa akümtsü' ta shiogo. Ibayongji ni tebilemtsü akar. Ni party nung inyakertem aser kübu den jembiba sülen telemtetba agitsü," ta pai ashi.

Farooq Abdullah-i tang Jammu region sema senzüdar, aser pai par jabasoi election nung tokteptsü memelungra pai tokteptsü, ta shiogo.

Taoba mapang Chief Minister, Farooq-i, "Omar-i elections nung metokteprer ni tokteptsü. Kodang state jenjang tanaben agütsüdir ni kü menden azüngtetsütsü aser Omar nem iba menden nungagi toktepdaktsütsü," ta ashi.

2019 küm Farooq Abdullah-i tesüsabuba election nung toktepa Srinagar nungi MP aküm aser taküm Lok Sabha election nung par jabaso Omar-i Baramulla menden nungi tamakok angu.

Haryana nung CM candidate ji nüburtem nem shimdaktsütsü: AAP

New Delhi, August 18

(Agencies): Amongnū Haryana nung AAP Tir, Sushil Gupta-i, October 1 nü agitsü aliba Haryana assembly election atema kobi melii party-i candidates sangdongtsü aser

metedaktsü.

AAP-i Janananyak Janata Party (JJP) den lokteptsü asü?, ta asüngdangba langzüdang Gupta-i, iba atemaji mejembir, ta ashi.

Dushyant Chautala-i aniba party aija Gupta-i, state sorkari aluyimertem dak ajok agi azükba mapang nung JJP-i BJP den loktepa liasü, anungji AAP-i parnoki den lokteptsü makok, ta ashi.

Gupta-i, "Haryana nung nüburtem AAP pusemtsü telemtetba agiogo, kechiyong parnoki atema lenmangji AAP dang lir ta parnoki bilemer. Onoki Haryana nüburtem den dang lokteper. BJP-i parnoki inyakba mapatem nung ajemdaker nüburtem dang vote memeshitetsü. Aluyimertem, mapa inyakertem aser doctor tem mepelar. Parnoki lanurtem nem mapa magütsütet," ta ashi.

"Kobi melii party candidates tenüng sangdongtsü. Onoki August 31 tashi nung candidates sangdongtsü merangtsü. Nüburtemi aginüba lenirtem nem AAP-i tickets agütsütsü. Candidate tem screening aser survey agi tenzükogo," ta pai metedaktsü.

Haryana nung AAP

nungi

chief minister candidate ji shiba

asütsü?, ta asüngdangba

langzüdang Gupta-i, CM

candidate ji nüburtemi shimsü,

ta metedaktsü.

"CM candidate shimsü

atema party nung bangdak

lenirtem aser political affairs

committee-i mapang tetemsü

nung nüburtem dang nungi

telangzüba meshitsü," ta pai

Taküm Lok Sabha election jakdang March ita nung BJP-i Chief Minister Manohar Lal Khattar anendaktsür state unit Tir, Nayab Singh Saini chief minister shima liasü.

Khattar-i Karnal Lok Sabha

menden nungi takok anguba

sülen pa Union minister

shimogo.



Kolkata, August 18, 2024: Tawa Kolkata nung aliba hospital ka nung doctor ka tashiyim amshia raksatsür tepsetba anema Amongnū Kolkata nung doctor tem aser tangartemi longkak aita jajadang tangokba noksa nung angur.



TIR YIMYIM

YIMOBILEM (EDITORIAL)

DIMAPUR TENTONÜ, AUGUST (LUROI) 19, 2024

Taneptsür tepsetba tejashi

Alima nung anogo shia tesem balala nung tashiyim agi tetsür taküm raksatsüba aser tepsetba ataloker, Ajisüaka tan August 9 nü RG Kar Medical College aser Hospital, Kolkata nung medical doctor akümtsü azünge Postgraduate trainee tetsür ka tepsetba otsü yabo kenyongi balaka aser tetsübutüsüka lir. Iba tetsürla ya la inyakba mozü kidang tepseter külen la temang reprangdangdang la dak tashiyim agi mapa tamajung inyakba zübo dang masü saka la ola madoktetsüsa terok shijang dena jendanga lensetba tarak liasü ta angazüker. Iba lendong ya tanga tesem ka nung atalok asübo otsü balaka süla, saka la inyakdak mozü kidang atalok asünung, ashiko, tangari masü saka külem kasa mozü kidang inyakertemiang inyak asütsü ta temulung melemia bilemer. Aji oda, iba lendong ataloker külen iba mozü ki tongti ketdangser nungi kecha balaka süoki ia bilemba tejashi aser tesasaba o memetdaktsüba aser Kolkata police-tem mapa nunga temulung masüba anema linük ajunga nungi nübortemi ola adokba angashir. Ano, mozü kidang taneptsür tetsür ka dak tashiyim agi mapa tamajung inyaker külenang tepseta yutsüba maparen aser ken o bushisüngdangtsü melen West Bengal Chief minister Mamata Banerjee-i anir nisung tepseter nem tasüba temerenshi agüjang ta takangba agüja lokti longkak ait sentong ayongzüka yimti yimdong sema jajaba mapajia khen reprangsü aser angatsübo shitak amai saka kiburi par kidang lendong atalokba anema medemer anir yimti yimdong nung ayimtena jajaba mapa ka dang asütsü. Shitakba agibo, Kolkata nung atalokba lendong mapaji CBI ama tangar nem mebushidaktsüi Chief minister leniba nung Kolkata police-i manger mesangwa tsüngdasa nisung tepsersetemji putetter alitsüla. Ibai shinga malidak arem mein ka nung atalokba lendong ka masü, anungji iba ama lendong atalokba ya putettsüabo Kolkata police daka tashi aser tokolok alitsü imlar. Ibai tejashitsüka, tesasatsüka aser tetsübutüsüka, anungji ya ser yamai mataloktsü atema tashiyim agi tetsür taküm raksatsür aser nisung tepsersetemji puteta tapet temerenshi agütsülsüta government nem takangba agüja linük ajaklen, asenok Nagaland nung dena, mozü kidang inyakertem longkak aitba asenoki angur aser asenoka parnok den adener. Aji oda, asenok aneptsütsüsa züngtetsüba doctor tetsür ka tepsetbaji par kibong aser kinungertem asoshi dang masü saka asenok ajak atema takoksa lir. Atangji, la taküm samaba ajanga ya ser akümlirtem asoshibo tajung ka adoktsü imlar. Ajisüaka, laji shirnoki kechiba tepset ta metettsüla la tepsetemji putet nung dang tarutsü asoshia tekümdangtsü sentong aser mapatem shitak latettettsü. Mozü kidang inyaker, Postgraduate trainee-ji atamata masü, iba ama tetsür ka tepsetbaji shi azü mazuöktetba kuli kija agibo masütsü aser la ola madokdaktsüi tepsersetemji tetezüji nisung ka kijai inyakba mapabo masüa ta CBI masüyonga asenokia angateter. Tanü asüng kinük-kisang ajak nung mozü ayokdak lapokyonga aoba ya tesüngmangtsüka aser asenok asoshia tekümdangtsü tulu lir. Aji oda, mozü ya kar dak alaka teimbaka asenoki alitetsüsa jenjang dalang agi angur, anungji wara tuluka melira mozü ayoker ajakbo tajangzük keta meinyaktetsü. Ajisüaka, tajangzük ngua mentetba tetezüji, ashiko mozü teimbaka taila mozü jenjang dalang agi alizüker ayokba agi asütsüa akok. Aji oda, mozü kidanga asenok nem item taila mozütemji agütsüra, asenok koda lendong tulu asütsü? Itemji asenokibo memetetsü. Aji oda, mozübo achir saka maneper aser tashidakbo tamajungba akümer ta asübaj, ashiko, mozü taila achiba agi asütsüa akok. Shirangertem dang nungi sen temeimba meimertem item ama mozü amshitsüba kecha tamakotsü mali. Aji oda, mozü ki aser mozü ayokdak tulu nung item ama taila mozü ayokbaj nokdangra, taila mozü yanglur aser ayoktemji takoksa tulu angutsü, anungji item jagibo nisung taküma mapayutsü! Kolkata nung atalokba lendonga yamaji tenzük asü ta külenbo temulung melemia bilemer.

OLEMSABANG

KECHIBA NUNGTUOGO AKÜMER?

~ S. Nuken Longkumer, Naga United Village, Nagaland


Ans: Kechiba alima nung nungtugo taküm ka akümer agutsüba ajanga nungtugo taküm ya akümer!! Kechiba yamai zülur tajung kümdaktsütsü asoshi jembir!! Tanü mapa kar atema mesüra tarutsü nüklatem nung rangloker o ya tamajunga jembitsüsa akümer!! Iba ama o tamajung jembiba aser inyakbaji angashir kulen mapa tajung inyaka sayudaktsütsü atema o ya jembia yoker!! Taku meteni tanang maka!! Timtim tejashi majangi tepela mali!! Tsükchirtem melira takoktsü lemang maka!! Ya asen meimchir rishikangshia aliba lima lir!! Tenükmerem aser taochi maliba lima?? Leper ama aser ponglang makaba ongken ta ajatsü tetemsü lima iba yagi asen meimchir temulungjang tarok ya onsara majung ta jungkai adoka sayur?? Teyanglur Tsüngremibö asen aliba alima ya onsara tepur junga yanglutsüogo?? Asen aliba lima ya kecha tena sendaktepa mali longzüa dang yutsüba tesümgangtsü Tsüngremer mapa asoshi??

Q: Iba yimti nung shirnoki na teti asanger, asüng asoshi tetsübutüsü tulu ir!! Shibai nü yimya nü chilu kanga junga meteta ali paji nü tembar masü nü tsükchir tulutiba lir?? Kumdangangma?? Alima nung tashi tulutibaji O mapa ya lir, iba o ya onsara tetsübutüsü, kodang ola adokdir mepong nung jajar aser iba olaji Atom bomb ama, H-Gen bomb ama tashi tulu akümer!! Tanü alima kin ajak anokshidaktsüba mapaji iba o ya lir!! Alima ajaki meteta aliba taoba mapang liner aser rarer nungtuogo Mr. Napoleon France lima setet, otzü ashiba agi pai o ya kanga tsübu ta ashir, aser iba o yagi pa yimli raksa laodaktsü ta ashir otzü aser osangkaket ya kanga nungtugo lir anungji otzü ya bazar nung sungolemba ayokdak mangutsü ta alima shisataka bushitepertemii ashir?? Anungji asen oshi yim yim bushiang shisatsü renlokang nai tangar ajateta aotsü!!

Q: Alima nung tesümgangtsü tatalokba mapa aika lir!! Aji oda yangi tesümgangtsü aser jangratemtsü otzü ka angur, Naga lima nung masü!! India lima nunga masü saka alima ajunga nung matalokba mapa ka asütsü asenok ajaki otzü meteta lir!! Asenok ajaki pungmang aser sarasadem ama-a-doker!! Alima nung nungtugo nisung rongnung tensemtsüsa Tsüngremi yanglutsüba taküm ya tetsüpok nung yanglur iba limai yok ta amanger?? Mr. Supong ya Tsüngrem akümtsübur aser ajemalur kipong nungi adok, tanü Tsüngremer yimli nung liner jenti setetdak Longsa lima nungi lir!! Naga nungertem aika penlatepogo?? Tzüyim aser alitakong yanglutsüba Tsüngremi Wapong Süpongmeren aser Congress lenir Supongmeren, Congress samar lia nüktüyima khuret abenba Supongmeren Jamir sanchanu ka ama kümer tsünü telok tulu tangi rongjenseta yokba lenir teyimla kecha maka pungmang ama bilemogo ni?? Osang balala angashia temulung raksa-a nüktü yimzüka alu?? Oh, Naga nungertem, Oh, Naga lima yamai ataloktsü ta meimla!! Tsüngremi Naga lima moajang, 1777 to 1800 shi nung America lima President Election mapang J. Thomas shibai iba amala tiaka yamai ajuru ta ashir, pai vote 1 ajanga agi takok ngua President menden nung amentsü mapang ajuru, Tsüngremer mapa koda tulu?? Tsüngremi Nagalima anir jaajtsü Mr. Supongmeren nem temoatsü den arishia tokjangma!!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeri angateta agitsü mepishir

Khristantem teimbakati AI ya Argo atema majung ta bilemer



ARTIFICIAL INTELLIGENCE

August 18, 2024: Pastor temi sayutsüngitsü atema Artificial Intelligence (AI) amshitsü shisadangba mapang ka nung Barna-i agiba survey ka ajanga, Khristantem teimbakati AI ya Argo atema majung ta bilemba bushitetogo.

Barna teloki Gloo den senteper agiba survey nungji US nung taintem aikati survey nungji shilem agia telangzüba agüja liasü.

“AI ya Argo atema junger” ta asuba nung Khristanten teimbakati aikaru makar. Survey nung shilem agir shilem 30-i AI ya Argo atema kanga majung ta ashi, shilem 21-i AI

ya Argo atema majung ta ashi aser shilem 27-ibo memetet, ta ashi.

Khristan shilem 6-i dang AI ya Argo atema junger ta ashi aser shilem 16-i AI ya Argo atema junger asütsü akok, ta ashi.

US nung taintem teimbakati parnoki tang tashi AI junga memetet ta ashi; shilem 10-i dang parnoki mapa mesüra nije business atema AI amshir, ta ashi.

US nung tain shilem 29-i “Ni AI dak melung malemer” ta ashi, shilem 35-i “Ni AI indang metetner” ta ashi aser shilem 21-i “Ni AI indang angazüksü

jangrar” ta ashi.

Gloo-i agiba survey ka ajanga bushitetba agi, Argo lenirtem shilem 63-i parnoki AI indang angateta lir ta ashi, shilem 28-i AI indang tera meteta lir mesüra khenyongi memetet ta ashi aser shilem 9-i dang AI indang junga angateta lir ta ashi.

Arogo lenirtem shilem 62-i parnoki pei mapa nung AI mamshir ta ashi, shilem 19-i khenken amshir ta ashi aser shilem 19-i hopta shia mesüra anogo shia khen amshir, ta ashi.

Arogo lenirtem shilem 54-i, Arogo nung AI amshiba atema tebilemtsü akar, ta ashi.

Alimai ola madokba agi Nigeria nung Khristantem jenti tepseter

August 18, 2024: Tawa Nigeria nunger tongti putir kati U.S. Congressional sub-committee dang, Nigeria sorkar aser alima linüktemi ola madokba agi Nigeria nung Khristantem jenti tepseter, ta metedaktsü.

House Foreign Affairs Committee kübok Subcommittee on Global Health, Global Human Rights aser International Organizations-i “Alima tesem ajaklen tamangba yimsü temeden” indang onüktem angadanga liasü.

Iba sentong nungji Nigeria nung Benue state kübok Makurdi nung Roman Catholic Argo nung tongti putir, Winfred Anagbe-i par Argo nung Khristantem aika tepsetba osang metedaktsüsü liasü saka pa iba sentong nungji medentet.

Ajisüaka pai iba osangi osangbenertem den lemsatep.

“Joko mapang talangka Islamic kiralongrartemi amakdang Khristan meyirjang aika tepsetba dang masü saka million aika jenshia Benue state tesem balala nung aliba camps nung jenoka lir,” ta pai metedaktsü.

“Tesem kar nungbo schools, clinics, Tenla kitem aser markets ajak raksatsüogo. 2014 küm ni tongti putir akümba mapang nungi tenzüka ni ayimjemba tesem aika Islamic kiralongrartemi atsüngadokogo aser Argo 14 bo samaogo,” ta pai metedaktsü.

Anagbe-isa, 2009 küm nungi tenzüka Benue state nung nisung jenti te p s e t b a , kiralongrartemi ali atsünga agiba aser nisung aika jenshiba osang tejangga metedaktsü.

2014 küm nungi tenzüka Benue state nung Argo züngsemtem aika samaogo, ta pai ashi.

“Mashisa tetsürtem aser tanurtem densema nisung aika tepsetba aser parnok li atsünga agiba ajanga rongsenkettsüng dak sendakba maparen ajak anenadokogo, aser iba ya Nigeria tesem balala nung Boko Haram densema Jidad telok balala ajanga lir,” ta Anagbe-i ashi.

Joko tesüiba küm aika meimchir temden atema inyakertem aser Nigeria nunger Khristan nung Khristantem den küləni benshitsü,” ta lenirtemi Nigeria kübok Middle Belt state tem

nung nisung meyirjang aika tepsetba atema tebilemtsü kaa lemsateper.

Khristan lenirtemibо yimsü nung ajemdaker Khristantem amaker ta ashir, ajisüaka Nigeria sorkaribo akhidang nungi aluyimertem (Khristantem) aser shiruru mesürtem (Muslim) tsüngda ralar, ta ashir.

Paisa, UN Office on Genocide Prevention & Responsibility dang, “Nisung jenti tepset tenzüka sülen nungi aibelenertem anema kecha meyiraker. Ozü linük sorkari nisung tepsetba nokdangtsü atema kecha meyiraker. Onok timtem atema sorkar aser alima tesem balala nung lenirtemi ola madokba ajanga, ‘ola madokba ya Benue state aser Nigeria tesem balala nung Islamic kiralongrartem parnok sünütsü südaktsütsü atema inyakba asalentong lir’ ta ni bilemer,” ta ashi.

Anagbe-isa committee züngsemtem dang, memenudang Benue state aser Nigeria tesem ajaklen Khristantem yaritsü atema inyakdaktsüner, ta mepishi.

ANOGO ABEN TSÜNGREM DEN

Chuba putirtem

Nenok teshimetetba kin, chuba putir telok, temeshi kin, aser Tsüngrem pei agitsü purtem nenok lir. 1 Peter 2:9

Na Khristan ka, süra na Tsüngremi shimitetba putir ka lir. Chuba putir ka ama na maneni chuba dangi aotsü lemang lapokja lir. Ne taküm nung nüngdak adokra, na atema tetsüngdai air putir ka bushitsü menüngdak. Na chuba putir.

Aji oda süaka putira, pa mapa lir. Putir inyakyim kübok putir kati putir mapa inyaktsüla. Laishiba nung putir kati kija inyakyim amshitsü shia mali, pa balaka tenzükba mapa mali. Putirtem külemei mapa inyaker (Lev. 9:1). Lairen masüba kija mapaji Tsüngrem putir kübok pai bilemba mapa nungi pilatsü akok.

Nübur matsüngdang putirji Tsüngrem melen noktakba lir, saka pai ano Tsüngrem dangi nübur tebilemba abener. Na meketa kar Tsüngrem dang mepishitsütsü putir sarasadem nüngdaka lir asü? Karbo ne taküm nung Tsüngrem angu nung dang Tsüngrem metetta arutsüba alitsü akok. Khristaji shidakba taküm lir ta pa nübur taküm agi sayuba alimai nüngdaker. Tsüngremi ajaba dang nungi asen mapa temaba südaktsüba lendong lir. Asenok mezüngbuba putir asütsü aja, aser tanabuba mapa ka nung sotdaktsü aja. Kodang asenoki ibai meinyaklir asen meketa alir ajaki asenok ajanga Tsüngrem dangi aotsü songtemtsü. Tsüngremi secular mapa kati ajatsü akok, saka iba dang nungi talisa na Pa putir ka asütsü shimitet.

Turkey-i maneni Khristantem anema inyaker

August 18, 2024: Meimchir nungi meindoker mesüra ainlen temeden atema inyakba senzütsü memelar. Talisa melungtet telok kari Turkey Protestant Khristantem nem N-82 code agüja lir, koba ajanga missionary tem dang bendanger Khristantem anema inyakba osang Human Rights Committee nem metedaktsü.

Turkey linüki parnok indang temzung alema inyakba dang masü saka 2003 küm Turkey-i agizükba International Covenant on Civil and Political Rights (ICCPR) alema inyaker.

Turkey-i ICCPR agizükba mapang nung Arrla 27 ajanga minorities kümzüksü atema nangzüka liasü saka linük nung minorities nem temeden magütsür.

“Republic of Turkey-i ICCPR kübok Arrla 27 nung alibaji Turkey linük temzung aser 1923 küm July 24 nü agizükba Treaty of Lausanne den küləni benshitsü,” ta nangzüka liasü saka iba ozüng kübok linük nung Khristantem reshikangshir.

Turkey nung alir bendanger Protestant Khristantem aiben legal tsütsü timtem ajurua linük

AO OSHI ANGAZÜKDAK:**TANÜ ANGAZÜKTSÜBA OJANG****Tama**


(adj) mezüngbuba (first)

* Asemtepertemi tama asütsü raktepa asemer.

Tama

(v) meblemtet mesüra bilemtetang ta ashiba (forgot, don't forget)

* Nei tama pa nem osang magütsü, anungji kenlirbo tama ta pai ashi.

OLONG PAITEP # 6899**TIPLER**

- Nisung jenti
- Tsük rudenba
- Temzung tesashi
- S. __ i
- Nisung rongnung telesma
- Anogoshi
- Ajanga aor
- Tsük rizüngdak
- Tebang nungi adokba
- Süngdong tatembangtiba
- Meputep

LANGTSÜNGLEN

- Tenük telong
- Committee dang ajar
- Yagi ki okdoker
- Yim lenmang
- Temoatsü keter meyipa aruba
- Kanga junga menemba
- Kenyongi majinü
- Rong kanga tulu

OLONG PAITEP # 6898 TELANGZÜBA**TIPLER :**

- Telok, 4. Aluru, 6. Ozüng,
- Emk, 9. Kin, 10. Teti, 12. Süir,
- Jen, 14. Ola, 16. Talak,
- Mazük.

LANGTSÜNGLEN :

- Tenükjang, 2. Luden,
- Kioktsü, 5. Lenti,
- Tajangzük, 11. Teronem,
- Sempa, 13. Jahaz.

NAI-A YA METETTER MA

Arishi küm 34 tain British nunger Joshua Bregmen-i 'world's highest altitude ski jump' naroküm ngutetogo. Himalayas nung Mera Peak nungi Nregman-i 5,716-meter-high cliff (18,753 feet) nungi ski jump asü aser ali nung parachute amshia lua anen.

Bregmen-i iba record attempt ya tenla bendentsü aser Nepal nung nisung shibelenba osang sangdongtsü atema inyak ta ashir.

2019 nung France nunger Matthias Giraud-i 4,359 m (14,301 ft) record yanglua aliba Bregmen-i ajatetogo.

ULFA-i bomb bushisüngdangtsü atema SIT tentetogo: Special DGP**Guwahati, August 18, 2024**

(Agencies): Independence Day nung bomb mesükba osettem yutsüba sülen Assam Police aser ozüng amerrtemi public kümzüka ayutsü tenangzükba ama mapa tuluba inyaker.

Tesem kar nung 'bomb-like objects' nguogo aser kettangsürtemi iba atema mapa inyakdar ta Special Director General of Police (DGP) Harmeet Singh-i ashi.

Iba atema Additional Superintendent of Police (SP) lenisüba kübok Special Investigation Teams (SITs) tentetogo aser parnoki bomb mesükba osettem jungjunga bushisüngdangtsü aser iba mapa inyaktem aputsü atema mapa nungloktsüogo, ta pai ashi.

"Onok asoshi tongtipangtiba mapaji Assam nung alirtem kümzüka ayutsüba lir. Item oset

anguba sülen review meeting ka menogo aser idangji asalentong kar yangluogo. Assam nung alirtem yirutsütsü merangertemi timtem tulu ajurtsü" ta Special DGP Singh-isa ashi.

Assam Police-isa public dang ULFA (I) ajanga bomb mesükba devices yutsüba osangtem meshiogo. Osang tejanga agütsür nem Rs 5 lakh senpet agütsütsü ta parnokisa shiogo.

IPFT-i Aug 23 nü New Delhi nung lungkak aittsü**Agartala, August 18, 2024**

(Agencies): BJP den tongti süa yariteper Indigenous People's Front of Tripura (IPFT)-i August 23 nü New Delhi kübok Jantar Mantar nung lungkak aitba sentong ka agütsü.

Centre-i Tripura Tribal Areas Autonomous District Council (TTAACD) jenjang ajungketer lisopurtem asoshi 'Tipraland' ta ser state balaka tentetang ta takhangba agüja IPFT-i iba sentong agütsü.

Tesüiba nunga onoki Jantar Mantar nung 'Tipraland' meshia lungkak aitogo ta IPFT General Secretary Swapna Debbarma-i ashi.

TTAACD ya Tripura asemsü nungi anasü lir aser iba nung nisung 1.2 million people tema lir. Nütsüng yongsük rongnung lisopur 84% shi lir saka 1982 küm TTAADC tentetba nükjidong ano matong lir.

IPFT lennirtemi August 23 nü Prime Minister Narendra Modi aser Home Minister Amit Shah na nem memorandum ka agütsütsü aser iba nung Constitution nung Arrla 2 aser 3 nung ajemdaker state balaka meshtüs.

"Tesüiba küm 15 tashi onoki 'Tipraland' atema jembia arur aser Tripura o New Delhi nung lungkak aitba sentonga aika agiogo" ta Debbarma-i ashi.

IPFT ya 'Tipraland' tentettsü atema 1990s nung tenzük. Iba sülen party nung telemsa aika adokogo aser tanishir kari Tipra Motha Party (TMP) nung denogo.

IPFT-i BJP den tesentaktep ka yanglu aser iba ajanga March 2018 Assembly elections nung CPI(M)-i aniba Left Front sorkar atsüngdoktsüsa takok ngua liasü.

TTAACD ya TMP ajanga kettangsür aser iba telok yaa BJP

den yariteper ka lir. TMP-i lisopur atema 'Greater Tipraland' ta ser state balaka meshir.

IPFT aser TMP-i akhangba ya BJP, opposition CPI(M) aser Congress teloktemi magizüker. IPFT aser TMP külemi yaritepa Jantar Mantar nung state balaka meshia lungkak aitogo.

Tang Tripura sorkar nungi IPFT nungi MLA ka dang lir paji Sukla Charan Noatia lir aser pai Cabinet minister inyaker.

March 2, 2024 nü TMP-i Centre aser Tripura sorkar den tenangzüktep ka agiba sülen March 7 nü BJP-i aniba sorkar nung parnok aden. Iba sülen TMP MLA ana- Animesh Debbarma aser Brishaketu Debbarma na minister inyaktsü shima liasü.

Taküm Lok Sabha elections nunga Tripura nung BJP, IPFT aser TMP külemi yaritepa nüboyima liasü.

Silchar jail nung 'Karagar Se Karigar' skill development program tenzük**Silchar, August 18, 2024**

(Agencies): 78 buba Independence Day nüngtem nung Assam Minister Nandita Gorlosa-i "Karagar Se Karigar" skill development program tenzüktsüogo.

Iba sentong ya Silchar Jail nung tenzüktsü aser societal rehabilitation & empowerment atema lir.

Silchar MLA Dipayan Chakraborty, District Commissioner Rohan Kumar Jha, Superintendent of Police Numal Mahato, SB Branch DSP Hemen Das aser Assistant

Commissioner Praveen Mahato nunger lia Nandita Gorlosa-i iba sentong tenzüktsü.

"Karagar Se Karigar" program ya Assam Chief Minister Dr. Himanta Biswa Sarma ajanga shisatetba sentong ka lir aser Assam kübok jail 29 nung iba sentong inyaktsü.

Silchar Jail nung puoka alir nisung 1,000 taküm melenshidakstsütsü atema iba sentong tenzük.

Iba sentong ajanga tepuokdak ayurtem nem tailoring, domestic data entry operations, hand-held

device maintenance aser hand embroidery training agütsütsü.

"Iba sentong ya skill training dang masü saka tarutsü atema teimla, maongka aser tenangzükba agütsür. Iba amala sentong ajanga nisungtem tanaben loktiliba den liromedema aotsü maongka agütsür" ta Minister Gorlosa-i ashi.

Minister Gorlosa-isa Silchar Medical College & Hospital (SMCH) nung Aadhaar center tasen ka lapoktsü. Iba centre nung mezüngbuba Aadhaar card ji kinü tanur ka indang yanglu.

Arunachal kübok Namsai jail nungi nisung 4 jena ao

Mineswar Dihingia (NSCN-U)

Dibrugarh, August 18, 2024

(Agencies): Arunachal Pradesh kübok Namsai jail nungi Honibar aonung nisung pezü jena ogo.

Parnoki ventilator grill kapoker jena ao aser idangji duty nung aliba sentry ka yirutsü.

Par pezü ya Arjun Kanda, Gopal Munda, Robin Surin aser Mineswar Dihingia nunger ta jangjago.

Par pezü rongnung Mineswar

Dihingia ya NSCN-U nung züngsema lir aser sepaitemi parnok bushitsü tenzükogo.

"Onoki outposts ajak nem osang sangoktsüogo. Par pezü pua arutsü atema search operations inyakdar. Parnoki komaser ventilator grill kakpok mejangja saka bushisüngdang südar" ta police kettangsür kati ashi.

July 2024 nung Arunachal

Pradesh aser Assam police tsüngda yaritepa Naharlagun nungi jena aoba nisung ka apu.

Iba nisung ya Isahan Deori (Patal) lir aser pa ya mezüngbo Lakhimpur, Assam nung apu.

July 12, 2021 nunga Arunachal Pradesh district jail ka nungi undertrial prisoners 7 jena ao. Iba ya East Siang district nung atalok.

Thailand PM inyaktsü Paetongtarn tezungzüktep agiogo



Bangkok, Luroi/August 18

(Agencies): Paetongtarn Shinawatra ya Thailand ato kilonser inyaktsü parliament nung shimer anogo ana lir chuba-ia melaogo.

Arishi küm 37 tain Paetongtarn ya Deobarnü tenzükzüktep agia Thailand indang ato kilonser tanutsütila kumogo.

Constitutional Court ajanga ato kilonser mapa nungi Srettha Thavisin anentsür anogo ishika lir lai iba maongka ya ajangzuka liasü.

La linük indang ato kilonser tasenba inyaktsü King Maha Vajiralongkorn-i melaba ya Bangkok nung sentong ka agidang House of Representatives Secretary Apat Sukhanand-i zunga liasü.

Hokulbarnü House of Representatives nung vote agitepdang Paetongtarn-i vote

shilem asem nung shilen ana jungnua agi takok angu, saka ibai tesüngmangtsü ka masü, kechiaser la ya taoba ato kilonser

Thaksin Shinawatra'er jala aser tenü ya Yingluck Shinawatra lir, shiba Thailand nung tetsür ato kilonser inyaker mezüngbuba liasü.

Chubai melaba nung shilem ka ama Paetongtarn ya chuba indang noksa ka jakdang temokok agi ali nung tsükita apudak aser iba sülen o tatsüka jembia liasü.

"Executive branch tekolakba ama ni legislators tem den külemi temulungjang lapoker kü mapa inyaktsü. Ni tebilemba ajak angatsü aser asenok lungjemer linük tejak leni anir aotsü," ta lai ashi.

Paetongtarn ya linük rongsenketzung jenjang mejungi aliba mapang ato

kilonser akumer, koba ajanga lar party bhukumer samaa ao.

Lai osangbener senden

mezüngbuba nung jembidang

lai la jakdang inyaka alisang

Srettha indang policy maneni

amshitsü aser rongsenketzung

tsütsü temelensi alitsü,

temesepba mozü azüoktsü,

linük indang universal

healthcare system tajungba

kumdaktsü aser 'gender

diversity' ajungkettsü, ta ashi.

Thai nunger asoshi rongsenketzung ya tebilemtsü tulutiba aser asangsang lir,

aser lar party-i digital wallet scheme mapa kuma meinyakba atema aikati asüngdanger. Iba ya Thailand nung voter shia nem sen \$300 agütsütsü nangzükba lir.

Paetongtarn-i tebu Thaksin ya sorkar mapa kecha nunga shimoktsü sentong mali saka pa indang shisa agitsü ta ashi.

shilem balala akum. Parnok ya bag ka nung inok. Parnoki kechi inyak? Parnoki Jews nunger tepset asü? Iba yagi Israel nem security agütsütsü asü?" ta pai ozuki kima nungi osangbener dang ashi.

Hamas-i aniba telungpur

telok temi October 7 nü Israel

south tsütsü nisung 1,200 shi

tepseter nisung 250 shi pua

bener ao. Item rongnung tang

tashi Gaza telung nung nisung

110 lir südi ta amanger aser

shilem asem süogo ta Israel

ketdangsürtemi ashir.

November ita hopta ka

ceasefire aliba mapang nisung

100 dak tema chioka liasü.

Tang tesüsa Israel-i tesem

balala nung bomb pokloksüba

nunya Deobarnep Dier al-

Balah jila nung nisung aliba ki

ka dena amak, kong tetsür ka

aser lar tanur trok asü, ta Al-

Aqsa Martyrs Hospital ajanga

ashi.

Item tanurtem indang tebou

Mohammed Awad Khatab-i

ashiba agi, par jala school

tesayur ya la kinungbo aser

tena tanur trok den par kidang

lia bomb pokloksü. Tanurtem

ya ita 18 nungi küm 15 tsünta

liasü. Tebu ya mozuki nung lir

ta pai ashi.

"Tanur trok ya temang

yimzung ken o jembitsü atema Deobarnü Cairo bushia aotsü lir, aser Blinken-i Hombarnü Netanyahu ajurutsü imlar.

Nigeria: Medical kaketsir 20 pur oa aliba kümzüktsü inyaktepdar

Abuja, Luroi/August 18

(Agencies): Nigeria anüdoklen medical kaketsir 20 pur oa aliba kecha timtem makai chiokdaktsütsü atema police aser security agency temi inyaktepdar, ta ketdangsürtemi metedaktsü.

Medical kaketsir tem ya annual convention ka nung adentsü atema oya aliba mapang Brehostibar nikongtsütsü Benue State nung pur ao, ta police aser university-i Honibarnü metedaktsü.

Federation of Catholic Medical and Dental Students-i sangdong ka ajanga ashiba agi, kaketsir tem tekümzükba kübok kecha tetsükdaktsü makai chiokdaktsütsü atema pai state nung security agency tem nem tetuyuba agütsüogo.

Kasa mapang nung national

police-i ashiba agi, parnoki

helicopters aser drone tem jelia

yokogo aser kaketsir tem

bushitsü atema specialized

tactical vehicles tem amshidar.

Kaketsir tem ya linük

anütoklientip len bus ana nung

oya aliba mapang pur ao, ta

Nigeria indang This Day osang

kaket sangdong ka ajanga

metedaktsü.

Paisa, item kaketsir tem

chioktsü atema sen meshiogo.

Nigerian Medical Association (NMA)-i, inspector general of police

dangi züluba shiti ka nung

NMA secretary-general

Benjamin Egbo-i ashiba agi,

pur or aliba kaketsir tem

rongnung parnok 12 Jos

University nungi aser parnok ti

Maiduguri University nungi lir.

Kaketsir tem ronung kati

parnok indang location

lemsatepogo aser iba ajanga parnok Benue State kübok Oglewu Ehaje tesemket nung alitsü ta jangjaogo, ta kasa shiti nung shia lir.

Item kaketsir tem pur aoba ya Benue State police indang public relations officer Catherine Anene-ia jangjatsüogo.

Benue State indang Angh

Hyacinth Alia-i sangdong ka

ajanga ashiba agi, kaketsir tem

tekümzükba kübok kecha

tetsükdaktsü makai

chiokdaktsütsü atema pai state

nung security agency tem nem

tetuyuba agütsüogo.

Kasa mapang nung national

police-i ashiba agi, parnoki

helicopters aser drone tem jelia

yokogo aser kaketsir tem

bushitsü atema specialized

tactical vehicles tem amshidar.

Kaketsir tem ya linük

anütoklientip len bus ana nung

oya aliba mapang pur ao, ta

Nigeria indang This Day osang

kaket sangdong ka ajanga

metedaktsü.

Parnok ya Otukpo jila anasa

lenmang ka nungi pur ao, kong

aiben iba amala lendong

ataloka arudar.

Nigeria nung nisung pur aoba

ken o kanga bulua küma odar.

2022 küm nisung pur aoer tem

nem senotsü magütsütsü atema

ozüng ka yangluogo, ajisüaka

pur aoer kinungertem aikati

ashiba agi, parnoki sen

agütsütsüba dak alaka tanga

lenmang kecha mangur.

Bangladesh interim govt. tekolakba Yunus-i Sheikh Hasina aitsü

Dhaka, Luroi/August 18

(Agencies): Bangladesh indang interim sorkar tekolakba

Muhammad Yunus-i Deobarnü

taoba Ato Kilonser Sheikh

Hasina aitsüogo. Hasina-i la

tashi angutsü atema linük nung

institution ajak raksatsüba

atema Yunus-i la aitsü aser

takaratiba nung ajaki sadem

sadema kecha tetsükdaktsü

makai ochishia shilem agitetsü

asoshi election ayongzüka

agitsü ta tenangzükba agütsü.

Sorkar mapa shilem aika

mekazüka toktsüba atema

kaketsir temi longkak aitba

mazuoktetü akümba sülen arishi

küm 76 tain Hasina-i August 5

nü mapa toktsü aser India-i jena

ao lisan.

Hasina-i mapa toktsüba

sülen arishi küm 84 tain Yunus-

i August 8 nü interim sorkar

Chief Adviser mapa agizüka

lietogo.

Yunus-isa, macroeconomic

tamendakdak yanglussü aser

renloka aotsü atema

rongsenketzung nung

temelensi bener arutsü atema

jenjang tapet agitsü ta

metedaktsü.

Pai ashiba agi, interim sorkar

Junior badminton championships atema asayar shimogo

Luroi/August 18, 2024 (Agencies): India team Badminton Asia (U-15/U-17) junior championships nung asayatsü atema renemdar, koba Chengdu, China nung August 20 nungi 25 tashi asayatsü lir. Linük tenüng nung asayatsü atema Bengaluru nung trail agiba sülen asayar 39 shimogo.

Taruba World Junior Championship atema lanur asayartem bushiteta anitettsü nükjidong nung iba asayamung nung shilem agitsü telemeteba agiogo. World Junior Championship ya India nung taruba küm asayatsü.

U-17 category ya Gnana Dattu aser Tanvi Reddy Andluri nati anir asayatsü aser U-15 category Shyam Bindiganavile aser Tanvi Patri na lenisüba nung asayatsü.

Taoba BAC championship koba kasa tesem nung asaya

liasü iba asayamung nung India i gold ka, silver ka aser bronze ka ta medal asem tashi ngua liasü. Bornil Changmai-i U-15 tebur kija asaya nung gold medal ngua liasü.

National Centre of Excellence, Guwahati nung training agiba sülen India team Honibarnü Chengdu-i apusoaoogo.

India Squad: U-15

Boys Singles: Shyam Bindiganavile, Shashank Vanamala, Prangan Choudhary, Pushkar Sai

Girls Singles: Tanvi Patri, Shaina Manimuthu, Gatha Suryawanshi, Hithashree L Rajaiah

Boys Doubles: Rahul Kadapakula/Vedant Pahwa, Shashwat Chaudhary/Shaurya Chaudhary

Girls Doubles: Shaina Manimuthu/Aikya Shetty, Nidhi

Atmaram/Selvasamruddhi Selvaprbaru

Mixed Doubles: Sahid Ibrahim Peer/Dheeshitha Singha Gopinath Singh, Kaveyugan KA/Anushka Jennifer AS

U-17:

Boys Singles: Gnana Dattu TT, Prateek Koundilya, Dev Ruparelia, Abhinav Garg

Girls Singles: Tanvi Reddy Andluri, Adarshini Shri NB, Parul Choudhary, Durga Isha Kandrapu

Boys Doubles: Bjron Jaison/Aathish Sreenivas PV, Abhinav Kandari/Yogansh Singh

Girls Doubles: Annaya Bisht/Angel Punera, Diya Bheemaiah B/Baruni Parshwal

Mixed Doubles: Showrya Kiran J/Keerthy Manchala, Manish Reddy/Deepak Raj Aditi.

AC Milan-i France nunger asayar Fofana alizükogo

WELCOME
YOUSSOUF FOFANA



Luroi/August 18, 2024

Monaco nung küm pongu asayaba sülen club toktsüogo. Taoba season pai Monaco nungi kanga junga asayaogo aser parnok Paris Saint-Germain sülen tanabuba jenjang nung tembanga liasü.

Fofana tang tashi nung France team nungi international asaya 21 nung asayar lir aser 2024 küm Euro nunga pa linük tenüng nungi asemen asayaogo aser quarter-finals nung Portugal den asayaba mapang pai penalty ka idakja liasü.

AC Milan-i France nunger midfielder Youssouf Fofana atema Monaco nem euro million 25 agütsü mulunga agizükogo, ta osang ajanga metedaktsü.

Honibar aonung Milan pur Serie A season tasenba nung mezüngbuba San Siro nung Torino den masaya tsüngda pa metetpela mapang agiogo.

Arishi küm 25 tain asayar ya

Marketa, Norrie na U.S. Open nung masayatsü

Luroi/August 18, 2024

Andreeescu aser Stan Wawrinka nunger ajak nem US Open kija asaya main draw nung shilem agitsü atema wildcards agütsüogo.

Japan tsür Osaka, shibai 2018 aser 2020 U.S. Opens kokogo, la tanur soa bentsüba sülen January ita nungi asaya tenzük aser WTA 1000 asayamung pezü tashi nung tasembuba round tonga asayaogo.

Canada tsür Andreeescu, shibai iba asayamung 2019 küm koka lir, la-a teberem yiruba ajanga ita teku masaya lir meyipa arur asayaba mapang lai French Open tasembuba round tonga asayaogo.

Maneni Swiss nunger asayar Wawrinka-i, 2016 küm U.S. Open koker lir aser pa nema taküm iba asayamung atema wildcard agütsüogo.

Austria nunger Dominic Thiem, shibai 2020 küm U.S. Open koka liasü, pai pa 2024 season tembangba sülen asaya nungi anentsü ta sangdongogo, pa nema wildcard agütsüogo. Pa tekanük yiruba ajanga junga masayateti kümogo.

Taküm U.S. Open ya August 26 nungi September 8 tashi New York nung asayatsü.

BILEMDANGANG

"Takokji temerangdancer meyong."

Punjab CM Mann-i Hockey asayartem nem tetushi agütsü



Bhagwant Mann

Luroi/August 18, 2024

(Agencies): Chief Minister Bhagwant Mann-i Deobarnü state nungi Paris Olympics nung bronze medal anguba asayartem nem sen crore kaka senpet agütsüogo.

Sentong ka ayongzuka agiba mapang, CM Mann-i ashiba agi, iba anogo ya kanga tongtibang anogo ka lir, kechiyong state nung soa intetba chirnurtemi state aser linük atema konang tetushi bener arutsüogo.

India tebur hockey team-i

Olympic anabuba atonga bronze medal nguogo. Taküm bronze medal atema Spain den asayaba mapang India-i goal 2-1 agi koka liasü.

Mann-i hockey asayar ti nem sen crore kaka agütsü aser state nungi Olympic nung shilem agiba asayar 11 nem sen lakh 15 (each) agüja liasü.

Mann-i ashiba agi, pa India team asayaba asaya ajak reprangogo aser parnoki kanga junga asayaba ajanga ajak kanga nema dangdaktsüogo.

Maneni paisa, medal anguba ya lispour ajak asoshi nükjidong atalokba ama lir ta ashiba den captain Harmanpreet Singh nem team kanga junga len aniba atema tenüng sang agüja liasü.

Mann-i ashiba agi, India hockey tem asüngsashiba mapang ka lir aser yakta taoba mapang ama kanga wangchia

akümtsü.

Pai, Punjab kübok Mohali nung November ita four-nation hockey asayamung ka ayongzuka asayatsü benokdang aser ashiba agi, iba dak sendakba nung pai Indian hockey ketedangsürtem den jembitsü.

Chief minister-i ashiba agi, iba asaya ajungketsü atema state sorkari bendanga agüja inyakdar aser takokba tashi jenjang ajak agitsü.

Pai, tasembuba 'Kheda Watan Punjab Dian' sentong August 28 nü tenzüktsü ta metedaktsü, koba state nung asaya ajungketsü atema asayamung tulutiba ka lir.

Mann-isa, state sorkari Mahilpur nung football asaya, Sangrur nung boxing, Jalandhar nung hockey, Ludhiana nung athletics asaya ajungketsü atema jenjang agitsü, ta ashi.

PM Modi-i Paris Olympics nung shilem agir India nunger ajuru

New Delhi, Luroi/August 18 (Agencies): Ato Kilonser Narendra Modi-i Paris Olympics 2024 nung linük tenüng nung shilem agir saisapongertem den Independence Day nung sensaksema indang lemsatepa liasü.

Paris Olympics nung Indian contingent-i alakteta shilem agiogo. Saisaponger ajaki pei tajungtiba agi shilem agi. Linük ajungai nenok takok asoshi tejak tenteter, ta Modi-i social media sapang nung lemsatep.

Ato kilonser-i India nunger saisapongertem nem tenüng sang agütsü, talisa Indian Men's Hockey Team, double-bronze-medalist Manu Bhaker, Sarabjot Singh aser Aman Sehrawat nungeri iba asayamung nung alakteta shilem agiba asoshi tushia liasü.

PM Modi-i saisapongertem den sensaksemdang parnoki timtem ajuruba, chiyongtsü aser tenüng balala jaloktsüba indang

asüngdanga liasü. Saisaponger temi PM dang asayamung tepiyong parnoki mobile phone mamshi ta ashi.

Melangteper Ritika Hooda-i tamakok ajuruba indang lemsatepdang PM Modi-i la ajungmesoa "Na ano lanur ka dang lir, na ano mapang talangka asayatetsü. Meranga practice süang," ta ashi.

Pai temulung raksaa Olympic medal mongutettsüa tensa ajurur alila Vinesh Phogat dang "tasü tait jala" ta aja.

PM Modi'er kidang iba senden amenba mapang pa nem Indian Hockey Team züngsem ajungai meyong nem agütsü aliba Indian Olympic jersey ka den hockey stick balaka agüja liasü.

Manu Bhaker, shibai bronze medal ana ngutet, laia ato kilonser nem air pistol balaka agütsü. Indian wrestler Aman Sehrawat-ia PM nem jersey ka agüja liasü.

PM Modi-i saisaponger

ajunga dang nüburtem dang sustainable development aser organic farming inyaktsü ajungshitsü shia liasü.

Iba sentong nung silver medallist javelin thrower Neeraj Chopra medentet, shiba Paris Games sülen pa yiruba anepalutsü atema Germany nun goa lir aser Europe nung Diamond League Meetings nunga shilem agitsü akok.

Iba sentong nung Sports Minister Mansukh Mandaviya aser Indian Olympic Association tir PT Usha nungera dena liasü.

India nunger saisaponger 117-i Paris Games nung asaya 16 - archery, athletics, badminton, boxing, equestrian, golf, hockey, judo, rowing, sailing, shooting, swimming, wrestling, table tennis, aser tennis nung shilem agiba nungi silver ka aser bronze medals pongo nguteta jenjang 71 buba nung tembang.

Kasa mapang nung taoba

mapang US Open koker aliba asayar Naomi Osaka, Bianca